



Kamis, 31 Agustus 2023

Ogen: 1 Samuel 25:36-38



"Nimai Paksa Si Payo"



Geluh enda erpaksa-paksa, umpama bagi roda erputar; pergancihen, maun arah teruh, maun arah datas; maun meriah iakap tapi bas paksa kentisik ndele ka ateta; maun terluka pusuhta tapi bas paksa si kentisik ipepalem ka pusuhta; maun seh bagi sura-surata tapi i bas paksa si kentisik bene ka kerinana; maun cirem kita tapi bas paksa sikentisik tangis kita; maun ikecewaken kita tapi paksa si kentisik itambari kecewanta. Kerinana nimai paksa si payo.

Abigail selaku ndehara Nabal ngalami kejadiin si erbahansa pusuhna terluka, kecewa, mbiar, merawa seh maka ngadu ia man rajana Daud. Abigail kecewa ngenehen perbahanen perbulangenna Nabal, si pendahinna erpesta-pesta seh mabuk. Kekecewaan Abigail la erbahanca ia putus asa seh maka la ikatakenna pusuhna rikut pe ras sura-surana man perbulangenna, tapi itimai Abigail paksa si payo guna ningetken sura-surana man Nabal perbulangenna. Abigail la tergesa-gesa erbahan keputusan tapi itimaina paksa si tepat guna nuriken isi pusuhna. Contoh enda patut si usih, i ja Abigail selaku ndehara i pernehenna lebe situasi rikut pe ras kondisi e maka ikatakenna kai si jadi sura-surana.

Situasi kegeluhen paksa enda pe iperluken kel kerna perukuren si bijak, ula metersa muat sada-sada keputusan. Sipelajarilah lebe situasi rikut pe ras kondisi e maka ibahan keputusenna; subuk i bas ingan erdahin, i bas persadan moria, bage pe i bas jabu. Persoalen banci saja turah ras perjengilen banci saja lit. Tertulis kap i bas anding-andingenta: "siksik lebe maka tindes" ertina ukuri lebe maka buat keputusenna. Ukuri untung-rugina; ukuri apakah keputusan e maba kejuah-juahen entah mpeturah persoalen si mbaru.

Nimai paksa si payo labo berarti kita lemah entah pe kalah; tapi i bas kita nimai paksa si payo banci maba kesenangan bage pe kemalemen ate arah keputusan ras tindakan si idalanken kita.

"Ukurilah lebe maka bahan keputusenna"